

## Furtivos nes nuestros montes y ríos

en La última ()  
La Voz de Lena

por Xurde Fernández

Los nuegos montes y los nuegos ríos sufren munches vegaes les aiciones de los cazadores y los pescadores furtivos que quieren cazar y pescar ensin tener los permisos afayadizos, en sitios onde nun puen cazar y pescar, y con artes que nun se puen usar por llei. En contra d'estos malos cazadores y pescadores el Serviciu de Proteición de la Natura de la Guardia Civil, el SEPRONA, vixila los nuegos ríos y montes.

Munches vegaes casos d'estes males artes danse nos montes y nos ríos del conceyu de L.lena.

Xurde Fernández

Dacuando'l Seprona (Serviciu de Proteición de la Natura de la Guardia Civil) prinda a cazadores furtivos nos montes asturianos (ente ellos los de L.lena), que tienen que pagar por ello multes abondo altes. Asina nel mes d'agostu d'esti 2012 el Principáu d'Asturies punxo una multa de 15.026 euros a caún de les cinco persones qu'abatieron furtivamente, nun terrén cinexéticu de réxime especial del conceyu de L.lena, a trenta y tres animales.

Pero non sólo existe esa mena de caza furtiva, también existen los llazos, técnica cenciella y barata pa cazar animales grandes como xabalinos, osos o llobos. Pa facer un llazu basta con unos pocos euros; basta con un cable de fierro doblao que fai les veces de llazu, una cadena p'atar bien el llazu a un árbol y guárdalo too bien ente la vexetación y la tierra y el barru pa camuflar bien la trampa (y hasta pa que garre'l golor de la natura).

L'animal cuando se ve cazáu tira, y al tirar, el llazu va apretándose más a la pata del animal. Si l'animal algama escapar la mayoría de les veces sufre la mutilación del miembru enllazáu.

Los ríos

Los ríos asturianos, y los de L.lena, tamién, sufren el furtivismu pente medies de pescadores que de día (en branu munches vegaes asemeyando bañistes) o de nueche asalten los ríos (tamién en temporada en que nun se pue pescar) con artefactos de pesca masiva como redes y fusiles.

Pero tamién existe otra manera de furtivismu nos ríos, l'envenenamientu col envís de robar pexes. Los pescadores furtivos avencen a actuar pela nueche echando nel ríu (o nel pozu onde hai salmomes) llexía o cloru (qu'acaben col oxixenu del agua y asfixen los pexes), después garren los pexes y llévenlos pa comelos yá que que bien llavaos nun representen nengún problema pa la salú.